

E aña aki lo dedica Dia Nacional di Aruba na señora Maybelline Arends-Croes

ORANJESTAD (AAN) -- Manera tur aña riba dia 18 di Maart, e pueblo di Aruba ta celebra masalmente su Dia Nacional; e fecha riba cual ta duna honor na nos simbolonan di identidad, esta nos himno, bandera, escudo y ortografia.

E dia aki ta sirbi tambe pa reflexiona riba un gran yiu di tera, señor Gilberto Francois (Betico) Croes, kende atravez

di un lucha di sudor y sanger a sabi di guia e pueblo aki pa bira un pais chiquito, autonomo den Reino Hulandes.

Un anhelo cu tabata biba pa mas di cincuenta aña bao di su pueblo a bira realidad debi na su perseverancia, sabiduria y consistencia.

E aña aki lo dedica e celebracion di nos Dia Nacional na e gran maestra di musica y

canto señora Maybelline Arends-Croes, kende por cierto ademas di ta colabora anualmente cu nos Dia Nacional, sa dedica hopi di su tempo na instrui y prepara nos hobennan den e ramo di musica y canto.

PROGRAMA OFICIAL Y ACTO PROTOCOLAR:

E comision organizador ya caba ta preparando e programa pa e anochi di Manifestacion Cultural cu lo tuma lugar diadomingo 17 di maart, riba Plaza Libertador G.F.Croes.

Lo bay tin un antesala for di

6'or di atardi cu lo dura te cu 8'or di anochi. Durante e antesala e publico por aprecia, entre otro, trabao di nos artesanonan local.

E programa oficial ta cumenza pa 8'or di anochi y lo termina 10'or, cu tiramento di vuurwerk, sigui pa musica en bibo di un banda local te cu 11'or.

Dialuna 18 di maart e acto protocolar lo cumenza pa 9'or di mainta riba Plaza Libertador Betico Croes. Pa esaki ya caba a manda e diferente formularionan di registracion di gruponan uniforme pa e desfile di e mainta aki. Tur grupo uniforme cu a ricibi e

formulario pero no a entrega esaki ainda, ta worde suplica pa percura na entrega esaki no mas laat cu dia 6 di maart awor, personalmente cerca Chéncho Kock na Instituto di Cultura.

Ta pidi tur grupo di Padvinderij, clubnan deportivo, gruponan cultural, gruponan uniforme di Gobierno manera Douane, Cuerpo Policial, Servicio Postal, y Cuerpo di Bombero, y gruponan religioso cu no a yena un formulario ainda pa tuma contacto cu Chéncho Kock na telefon 831618 of 822185. Corda cu ultimo dia pa entrega e formulario ta diarazon 6 di maart awor!

Diario . - (2 maart 2002)